

in persona dicti G. unam et dicto abbati aliam me oporteat responsionem facere. Sed si vultis, quod cardinalis Tusculanus, qui est in illa retrocamera, qui est amicus regis et de hiis multa novit, sit presens ad ista, placet nobis'. (15) Et tunc nos respondimus quod, licet non esset impositum nobis per vos, loqui de illis articulis reges Alemannie et Sicilie tangentibus, nec dictus dominus G. ex parte vestra, quod sciremus, nec ex parte nostra de predictis loquutus fuisset, nisi quantum audiveramus in presentia camerarii per repetitionem dicti domini G., dicto abbate in presentia nostra dicente domino pape, quod de predictis tribus articulis sibi loquutus fuerat de mandato vestro et quod pro eis et aliis magnis et maioribus missus per vos fuerat, diximus quod libenter audiremus, quod ipse papa nobis diceret et ea referremus domino G. et vobis, si placeret eidem, et quod multum volebamus, quod esset presens dominus Tusculanus. Et vocato domino Tusculano, papa voluit, quod cardinalis Burdegalensis et camerarius repeterent verba eis dicta per dominum G. de Nogareto. Quod et fecerunt. (16) Et postmodum papa nobis et predicto abbate ad hoc specialiter nobiscum vocato per papam presentibus, in presentia dictorum cardinalium dixit papa eidem abbati: 'Abbas, de hiis, de quibus loquutus es nobis, tangentibus reges Romanorum et Sicilie loquutus fuit Guillelmus de Nogareto cum cardinale Burdegalensi et camerario, per nos deputatis ad hoc sibi ad instantiam suam et requisitionem regis per litteras regias. Verumtamen ad alium finem tendent verba tua et ad alium verba G. de Nogareto. Vis tu, quod nos recitemus ipsis presentibus, qui sunt de consilio regis omnes, verba, que dixisti et ad quem finem?' Qui respondit: 'Non'. Et iterum papa dixit ei: 'Vis tu, quod ego legam eis scripturam, quam dedisti^a michi super hiis, quia videtur michi bonum, quod ipsi sciant?' Et adhuc abbas respondit: 'Nolo'. Et tunc papa dixit ei: 'Ex quo tu non vis, quod ipsi sciant ea que dixisti nobis et responsionem nostram, quam eis facere debemus, nec tu scies ea que dixerunt nobis nec responsionem, quam faciemus eisdem'. Et tunc abbas recessit. (17) Et tunc papa incepit nobis respondere dicens, quod facile sibi erat respondere, quia non erant verba illa, que sibi imponebantur. Verumtamen declaravit nobis preterea que sequuntur, videlicet quod non nimis propere vel precipitanter processerat in negotio approbationis electionis

a) Aus 'dixisti' corr. Or.